
GARINS LO BRUS.

7225-6, 7698, M.

Noitz e jörn sui en pessamen
D'un joi mesclat ab marrimen ;
E no sai à qual part m'apen ,
Aissi m'an partit engalmen
Mezur' e leujairia.

Mezura m ditz suan e gen
Que fassa mon afar ab sen :
E leujairia la m desmen ,
E ditz que si trop m'i aten
Ja pros no serai dia.

Mezura m'a éssenhat tan
Qu'ie m sai alques gardar de dan ,
De fol e de datz e de fan ;
E sai be cobrir mon talan
De so que plus volria.

Leujairia no m pres' un guan
S'ieu no fau so que'l cor me man ,
E tuelh' e do e l'aver s'an :
Quar qui plus n'a plus pren d'engan
Quan ven à la partia.

Mezura m fai soven estar
De manh rir' e de trop jogar ,
E m veda quan vuelh mal parlar ;
Ni si vuelh trop mon aver dar
Ella m ditz que m n'estia.

Leujairia m tol mon pessar ,
E m ditz que per trop castiar
Non dei ges mon talan laisser ;

Quar si tot fatz quan poirai far
Non er la colpa mia.

Mezura m ditz qu'ieu non domnei
Ni ja per domnas no follei,
E s'amar vuelh esguar ben quei ;
Quar si penre vuelh tot quan vei
Leu m'en segra folia.

Leujairia m mostr' outra lei ,
Qu'abratz e percol e manei ,
E fassa so qu'al cor m'estei ;
Quar si no fatz mas tan quan dei
Meta m en la monjia.

Mezura m ditz non si' escas
Ni ja trop d'aver non amas ,
Ni non dar ges tot quan que as ;
Quar si dava tot quan mi plas
Pueis de que serviria ?

Leujairia m'esta de las
E ditz mi , e tira m pel nas ,
Amics , ben leu deman morras :
E doncs pus seras mortz él vas
Avers pueis que t faria ?

Mezura m ditz suau e bas
Qu'ieu fassa mon afar de pas.
E leujairia ditz : que fas ?
Fai ades aita quan poiras ,
Que'l terminis s'enbria.

Messatgier lo vers portaras
N Eblon de Senhas , lo m diras
Si cum Brus loil envia ;
Al partir lo m saludaras
E pueis ma douss' amia.

E digas me quan tornaras
Quals d'aquestz dos cosselhs penras ;
Qu'ieu vuelh n'aias la tria.